



古活字版
古今事文類聚
元和中刊



卷之八十五

菓實部

荔枝

龍眼附

古今事實

交趾入獻

詔貢龍荔

楊妃所嗜

贈荔枝圖

荔枝為首

古今文集

雜著

荔枝圖序

白居易

荔枝譜一

蔡君謨

荔枝譜二

蔡君謨

荔枝譜三

蔡君謨

書荔枝譜後

歐陽永叔

莆田荔枝

洪景廬

荔枝賦

張九齡

古詩

荔枝

劉欣

荔枝歎

蘇子瞻

荔枝歌

陳去非

律詩

題荔枝十八韻

白居易

荔枝

韓偓

華清宮

杜牧

戲答惠荔子

劉貢父

荔子

劉彥冲

荔子

劉彥冲

古詩

以下係龍眼

廣州龍眼味殊絕可敵荔枝蘇子瞻

律詩

龍眼劉彦冲

詩話

辨蜀都賦



梅實杏附

古今事實

相作鹽梅

望梅止渴

梅為曹公

文杏以下係杏

董仙杏林

隣杏還主

饋杏廢宅

古今文集

古詩

古風上蘇子瞻黃魯直

律詩

紅梅羅隱

古詩係杏

答晁適道乞消梅黃魯直

折杏子楊廷秀



葡萄

古今事實

得種大宛

葡萄為酒

苑中馬乳

草龍珠帳

葡萄遺母

古今文集

雜著

示羣臣詔魏文帝

古詩

葡萄歌蜀禹錫

律詩

葡萄韓愈

葡萄楊廷秀

葡萄架



櫻桃

古今事實

獻宗廟

賜朱櫻

古今文集

伐櫻桃樹賦

雜著

櫻桃 范至能

食賜櫻桃成十四韻

櫻桃 陳去非

和敕賜櫻桃

謝楊尚書惠櫻桃

赤英盤進

品居第三

蕭頴士

白居易

韓愈

盧延遜

杜甫

韓愈

韓愈

韓愈

韓愈

韓愈

湖南少食桃見惠

琴魏衍惠朱櫻

櫻桃薦酪

桃實

古今事實

啖以餘桃

二桃殺三士

漢武得種

求種不得

古今文集

桃賦

桃實

先秦後桃

方朔竊桃

劉阮採桃

李並附

李並附

李並附

李並附

李並附

李並附

李並附

李並附

李並附

古今事實

糟食李實

崑崙王李

漢武得種

道傍苦李

房陵佳李

啖李伐樹

曹李鑽核

來禽李子

名嘉慶子

指李為姓

以下係李樹

博勞集樹

柰實冬生

以下係柰樹

抱樹護柰

兒不顧柰

兒不敢嘗

共食白柰

古今文集

律詩

嘉慶李

白居易

人面子

楊廷秀

來禽

劉彥冲

卷之八十六

菓實部

古今事實

菱

古今事實

嗜菱

裂菱衣

益蓄菱茨

懶著菱衣

古今文集

雜著

論屈建文

孫楚

律詩

食老菱有感

楊廷秀

七月望觀菱濠

楊廷秀

菱沼

楊廷秀

食菱

楊廷秀

古詩

係菱

初食雞頭有感

歐陽永叔

食雞頭

蘇子由

律詩

食雞頭

食雞頭

楊廷秀

詩話

炎名鴈頭



蓮實

藕附

古今事實

燕用乾藕子

古今文集

古詩

顛上食蓮有感

黃魯直

律詩

蓮房

司馬君實

古詩

係藕

山谷坐上分題賦藕

胡致隆

律詩

藕

楊廷秀



石榴

古今事實

張騫得種

獻安石榴

石榴多子

古今文集

古詩

石榴

石榴

梅聖俞

石榴歌

莊布

石榴歌

皮日休

律詩

石榴

鄭儼

石榴

楊廷秀

石榴



棗

古今事實

棗大如瓜

棗實如瓶

海棗不實

嗜羊棗

棗栗濟飢

覆射棗

伐棗去婦

以棗塞鼻

周文之棗

棗投栗報

古今文集

古詩

棗後秦趙整

棗梁簡文帝

賊棗王介甫

瓜木瓜附

古今文集

芸瓜忤父

瓜時而代

視瓜坑儒

東陵種瓜

鄰瓜羨惡

王母仙瓜

設瓜得墓

種瓜自給

盜瓜知悅

三莖一實

削瓜侵肉

寒瓜遺母

獻瓜設官

逐兔踐瓜

蠅集瓜上

坐上種瓜

饅瓜念舊

古今文集

古詩

甘瓜范至能

園人送瓜杜甫

律詩

致中惠瓜二絕劉彥冲

食瓜有感黃魯直

古詩

係本亦

木瓜范至能

律詩

野店多賣木瓜楊廷秀



古今事實

烏桕八稜

古今文集

律詩

桕柿

劉彥冲



梨

檇附

古今事實

共食紫梨

含消梨

食取小梨

張公梨

好梨不蒸

釘坐梨

梨貌刀斧

樹下楊妃

檀難比梨

係檀

古今文集

律詩

讀鄭侯傳

陸務觀

梨

劉彥冲

食梨

朱元晦

梨

楊廷秀

詩話

帝為燒梨

卷之八十七

菓實部



栗

古今事實

狙公賦芋

報以戰栗

擲栗卜郡

兒不爭栗

栗綴於鼻

古今文集

律詩

栗

蘇子由



橘金橘
根並附

古今事實

橘中之樂

蒂十二實

懷橘遺母

橘葉治病

義之橘帖

贈群臣橘

金橘後出

柑缺一瓣以下係柑

廉不受柑

義之柑帖

布裹甘子

千頭木奴

甘畏壞爛

上元傳柑

古今文集

雜著

黃柑陸吉傳

蘇子瞻橘頌屈原

古詩

病橘杜甫

律詩

故人九日求橘

韋應物

田園雜興

范至能

和賜後苑金橘

李邦直

歐陽從道寄金橘

黃魯直

雜著

以下係柑

謝湘東王賚柑啓

梁庾肩吾

古詩

甘雨杜甫

柳州城北種柑

柳宗元

食甘

蘇子瞻

根子

歐陽永叔以下係根

贈景文

蘇子瞻根劉彥冲

食根寄謝舍人

梅聖俞

枇杷

古今事實

事類彙編

周祗植庭

古今文集

律詩

枇杷 楊廷秀

枇杷 劉彥冲



楊梅

古今事實

此楊家果

古今文集

律詩

楊梅 可止平

謝紹興帥惠楊梅 楊廷秀



蔗 糖霜附

古今事實

漸入佳境

鼠矢汚錫

始創糖霜 係糖霜

古今文集

雜著

蔗產南方

古詩

賦得甘蔗 舒信道

雜著

以丁侯糖霜

糖霜譜

律詩

糖霜 楊廷秀



橄欖 餘甘附

古今事實

古今文集

古詩

橄欖 歐陽永叔

橄欖 劉貢父

橄欖 王元之

律詩

橄欖

蘇子瞻

古詩

係餘柑

餘柑

劉彥冲



眾菓

古今事實

關

古今文集

古詩

梅聖俞寄銀杏

歐陽永叔

和聖俞鴨脚子

歐陽永叔

宋叔遺新生鴨脚

梅聖俞

古詩

係榧子

送鄭戶曹賦席上果得榧子

蘇子瞻

新編古今事文類聚卷之八十五

小汀文庫

建安祝穆和父編

菓實部



荔枝

龍眼附

羣書要語

荔枝樹高五六丈大如桂樹綠葉蓬

蓬冬夏榮茂青華朱實大如雞子核

黃黑似熟蓮子實白如肪甘而多汁似安石榴有

酸甜者至日將中翕然俱赤則可食也一樹下子

百斛

廣志

荔枝性熱有人日噉千顆未嘗為疾即

少熱以蜜漿解之

荔枝譜

最忌麝香或遇之花實盡

落

同上

民間以鹽梅醃浸佛桑花為紅漿投荔枝

漬乾曝之色紅而味酸可三四年不蛀

同上

蠟渴

補髓

葛洪云

荔子丹号蕉黄

韓文

則生荔枝

左蜀都賦

詩句

輕紅擘荔枝

杜

京華應見無顏色紅顆酸甜

只自知

杜

香連翠葉真堪畫紅透青籠實可憐

易

龍眼

樹如荔枝但枝葉稍小殼青黃色形如彈丸

核如木梳子而不堅肉白而帶漿其甘如蜜一朵

五六十顆作一穗如蒲萄然荔枝過即龍眼熟故

謂之荔枝奴

密舍南方草木記

傍挺龍眼

左蜀都賦

古今事實

交趾入獻

漢永元間嶺南獻生荔枝十里一置五里一候晝夜傳送唐羗上書曰臣聞上不以滋味為德下不

以貢膳為功伏見交趾七郡獻生荔枝龍眼等南
州土地炎熱惡蟲猛獸不絕於路至於觸犯死亡
之害此二物升殿未必延年益壽詔敕太官勿復
受獻

詔貢竜荔

魏文帝詔羣臣曰南方果之珍異者有龍眼荔枝
令歲貢焉出九真交趾

楊妃所嗜

楊妃嗜荔枝當時以馬逆馳載七日七夜至京人
馬多斃於路百姓苦之

贈荔枝圖

劉崇龜姻舊或干以財崇龜不答但畫荔枝圖與

之本傳

荔支爲首

李直方嘗第果實名以綠李爲首櫻梨爲副櫻桃爲三柑子爲四蒲桃爲五或薦荔支曰當舉之首

國史補

古今文集

雜著

荔支圖序

白居易

荔支生巴峽間樹形團團如帷蓋葉如冬青華如橘春榮實如丹夏熟朶如蒲萄核如枇杷殼如紅繒膜如紫綃瓢肉潔白如冰雪漿液其酸如醴酪大略如彼其實過之若離本枝一日而色變二日

而香變三日而味變四五日外色香味盡去矣元和十五年夏南賓守樂天命工圖而書之蓋爲不識者與識而不及一二三日者云

荔支譜一

論嶺南巴蜀荔支

蔡君謨

荔支之於天下惟閩粵南粵巴蜀有之漢初南粵王尉他以之備方物於是始通中國司馬相如賦上林云答選離支蓋夸言無有是也東京交趾七郡貢生荔支十里一置五里一墩晝夜奔騰有毒蟲猛虎之害臨武長唐羗上書言狀詔太官省之魏文帝有西域蒲萄之比世譏其謬論豈當時南北斷隔所擬出於傳聞耶唐天寶中妃子尤愛嗜涪州歲命驛致時之詞人多所稱詠張九齡賦之

以託意白居易刺志州既形於詩又圖而序之雖
鬚髯顏色而甘滋之勝莫能著也洛陽取於嶺南
長安來於巴蜀雖曰鮮猷而傳置之速腐爛之餘
色香味之存者亡幾矣是生荔支中國未始見之
也九齡居易雖見新實驗今之廣南州郡與夔梓
之間所出大率早熟肌肉薄而味甘酸其精好者
僅比東閩之下等是二人者亦未遇夫真荔支者
也閩中唯四郡有之福州最多而興化軍最爲奇
特泉漳時亦知名列品雖高而寂寥無紀將尤異
之物昔所未有乎蓋亦有之而未始遇乎人也予
家莆陽再臨泉福二郡十年徃還道由鄉國每得
其尤者命二寫生稗集旣多因而題日以爲倡始

夫以一木之實生於海濱崑險之遠而能名徹上
京外被夷狄重於當世是亦有足貴者其於果品
卓然第一然性畏高寒不堪移植而又道理遼絕
雖不得班於盧橘江橙之右少發光采此所以爲
之歎惜而不可不述也

二論興化荔支

興化軍風俗園池勝處惟種荔支當其熟時雖有
他果不復見省大重陳紫富室大家歲或不嘗雖
別品千計不爲滿意陳氏欲採摘必先閉戶隔牆
入錢度錢與之得者自以爲幸不敢較其直之多
少也今列陳紫之所長以例衆品其樹晚熟其實
廣上而圓下大可徑寸有五分香氣清遠色澤鮮

紫殼薄而平瓢厚而瑩膜如桃花紅核如丁香母
剥之凝如水精食之消如絳雪其味之至不可得
而狀也荔支以甘為味雖百千樹莫有同者過甘
與淡失味之中唯陳紫之於色香味自拔其類此
所以為天下第一也凡荔支皮膜形色一有類陳
紫則已為中品若夫厚皮尖刺肌理黃色附核而
赤食之有查食已而澁雖無酢味亦自下等矣

三論福州荔支

福州種植最多延馳原野洪塘水西尤其盛處一
家之有至於萬株城中越山當州署之北鬱為林
麓暑雨初霽晚日照耀絳囊翠葉鮮明蔽映數里
之間焜如星火非名畫之可傳而精思之可述觀

覽之勝無與為比初著花時商人計林斷之以立
券若後豐寡商人知之不計羨惡悉為紅鹽去聲
水浮陸轉以入京師外至北戎西夏其東南丹行
新羅日本流求大食之屬莫不愛好重利以疇之
故商人販益廣而鄉人種益多一歲之出不知幾
千萬億而鄉人得飫食者蓋鮮以其斷林鬻之也
品日至眾唯江家綠為州之第一

陳紫興化

江家綠

方家紅

游家紫

小陳紫

宋公荔

藍家紅泉州

周家紅興化

何家紅漳州

法石白泉州

綠核

圓丁香

虎皮

牛心

玳瑁紅

硫黃

朱柿

福州

蒲桃

蚌殼

龍牙

水荔枝

蜜荔

丁香荔

大丁香

雙髻

真珠

十八娘

將軍荔

釵頭顛

粉紅

中元紅

火山

本出廣南

右三十三品言姓氏尤其著者也言州郡記所出也不言姓氏州郡四郡皆或有之

書荔枝譜後

歐陽永叔

牡丹花之絕而無甘實荔枝果之絕而無名花昔樂天有感於二物矣然斯二者惟不兼萬物之美故各得其精造化之理宜如此也余少游洛陽花

之盛處也因爲牡丹作記君謨閩人也故能識荔枝而譜之因念昔人嘗有感於二物而三人者適各得其一之詳故書其所以然而附於君謨譜之末

莆田荔枝

洪景廬

莆田荔枝名品皆出天成雖以其核種之終與其本不相類宋香之後無宋香所存者孫枝爾陳紫之後無陳紫過墻則爲小陳紫矣筆談謂焦核荔子土人能爲之取本木去其大根火燔令焦復植於土以石壓之令勿生旁枝其核自小里人謂不然此果形狀變態百出不可以理求或似龍牙或類鳳爪釵頭紅之可簪綠珠子之旁綴是豈人力

所能加哉初方氏有樹結實數千顆欲重其名以二百顆送蔡忠惠公給以常歲所產止此公爲目之曰方家紅著之於譜印證其妄自後華實雖極繁茂逮至成熟所存者未嘗越二百遂成語識此段已載遜齋閑覽中郡士黃勳權復志其詳如此

容齋隨筆

荔支賦

并序

張九齡

南海郡出荔支焉每至季夏其實乃熟狀甚瓌詭味特甘滋百果之中無一可比余徃在西掖嘗盛稱之諸公莫之知固未之信唯舍人彭城劉侯弱年累迂經于南海一聞斯談倍復嘉歎以爲甘羨之極也又謂龍眼凡果而與荔支齊名魏文帝方

引蒲萄及龍眼相比是時二方不通傳聞之大謬也每相顧閑議欲爲賦述世務卒卒此志莫就及理郡暇日追叙徃心夫物以不知爲輕味以無味而疑遠不可驗終焉永屈况士有未効之用而身在無譽之間苟無深知與彼亦何以異也因導揚其實遂作此賦云

果之美者厥有荔支雖受氣於震方實稟精於火離乃作酸於此裔爰負陽以從宜蒙休和之所播涉寒暑而匪虧下合圍以擢犀傍蔭畝之抱規紫文紺理黛葉紺枝箭茸霽霽環合焚維如蓋之張如帷之垂雲煙沃若孔翠于斯靈根所盤不高不卑陋下澤之沮洳惡層崖之險巖彼前志之或妄

何側生之見疵爾其勾芒在辰觀風入律肇氣含
滋芬敷謐溢綠穗靡靡青英苾苾不豐其花但肯
其實如有意乎端本故微文而妙質帶葯房而粹
萃皮竈鱗以駢比膚玉英而含澤色江蒨以吐日
朱芭剖明璫出罔然數寸猶不可匹未玉齒而殆
銷雖瓊漿而可軼彼衆味而有五此甘滋之不一
伊醪淑之無筭非精言之能悉聞者歡而竦企見
者訝而驚侘心恚可以蠲忿口爽可以忘疾且欲
神於醴露何比數於甘橘援蒲萄以見擬亦古人
之深失若乃華軒洞開嘉賓四會時當燠煜客或
煩憤而斯果在焉莫不心侈而體泰信瑯盤之仙
液實玳筵之綺績有終食於累百愈益氣而理內

故無厭於所甘雖不貪而必愛沉美李而莫取浮
甘瓜而自退豈一座之所榮冠四時而爲最夫其
貴可以薦宗廟珍可以羞王公亭十里兮莫致門
九重兮曷通山五嶠兮白雲汪千里兮青楓何斯
美之獨遠嗟爾命之不逢每被銷於凡口罕獲知
於貴躬柿何稱乎梁侯梨何幸乎張公亦因地之
所遇孰能辨乎其中哉

古詩

荔支

劉貢父

南州積炎德嘉樹凌冬綠薰風海上來丹荔逾夏
熟煌煌錦繡林亭亭翡翠屋鵠頭爛晨霞天酒瑩
寒玉流聲感華夏採掇如不足開元百馬死漢堠

五里促君王王食間此薦知不辱迨今糟粕餘猶
足驚凡目憶初成上林四方會奇木使臣得安榴
天馬來首荷擢身自幽遐託地幸滲漉我欲咎真
宰喟茲限羗服將非名實雄百果爲羞縮區區化
工意聊爾存衆族

荔支歎

蘇子瞻

十里一置飛塵灰五里一埃兵火催顛坑仆谷相
枕藉知是荔支龍眼來飛車跨山鵬橫海風枝露
葉如新採宮中美人一破顏驚塵濺血流千載永
元荔支來交州天寶歲貢取之涪至今欲食林甫
肉無人舉觴醉伯游我願天公憐赤子莫生尤物
爲瘡痂兩順風調百穀登民不飢寒爲上瑞君不

見武夷溪邊粟粒芽前丁後蔡相籠加爭新買寵
各出意年年闢品充官茶吾君所乏豈此物致養
口體何陋耶洛陽相君忠孝家可憐亦進黃姚花

荔支歌

陳去非

炎精孕秀多靈植荔子佳名聞自昔絳囊剖雪出
瑯盤尋常百果無顏色閩天六月雨初晴星火熒
煌耀川澤歛如彩鳳戲翱翔爛若彤雲堆翕赫中
郎裁品三十二陳紫方紅冠儔匹鹽蒸蜜漬尚絕
倫啄瓊空羨南飛翼我聞至和全盛時貢輸不減
開元日涪州距雍已云遠况此奔馳來海側繡衣
使者動輜車黃紙封林遍阡陌浮航走輟空四郊
妙品人間無復得似聞供給只纖毫往往盡入公

侯宅驪山廢苑狐兔靜良嶽新宮鼙鼓急繁華今
古共淒涼遶樹行吟悲野客西風刮地戰塵昏一
聽胡笳雙淚滴

律詩

題郡中荔支詩十八韻兼寄萬州楊使

君

白居易

奇果標南土芳林對北堂素華春漠漠丹實夏煌
煌葉捧低垂戶枝擎重壓墻始因風弄色漸與日
爭光夕訝條懸火朝疑樹點粧深於紅躑躅大校
白檳榔星綴連心朶珠排耀眼房紫羅裁襯殼白
玉裹填囊早歲曾聞說今朝始摘嘗嚼疑天上味
嗅異世間香潤勝蓮生水鮮逾橘得霜燕脂掌中

顯甘露舌頭漿物少尤珍重天高苦渺茫已教生
暑月又使阻遐方粹液靈難駐妍姿嫩易傷近南
光景熱向北道途長不得充王賦無由寄帝鄉唯
君堪擲贈面白似潘郎

荔支

韓偓

遐方不許貢珍奇密詔唯教進荔支漢武碧桃爭
比得在令方朔號偷兒

封開玉籠雞冠澁葉襯金盤鶴頂鮮想得佳人微
露齒翠釵先取一枝懸
巧裁絳片畏神漿崖蜜天然有異香應是仙人金
掌露待成冰入茜羅囊

華清宮

杜牧

長安回首繡成堆，山頂千門次第開。一騎紅塵妃子笑，無人知是荔枝來。

戲答惠荔枝

劉攽

錦筵火齊堆金盤，五月甘漿破齒寒。南國已隨朱夏熟，北人猶指畫圖看。煙嵐不續丹櫻獻，玉座空悲羯鼓殘。相見任夸雙蒂羨，多情莫唱水晶丸。

荔子

劉彥冲

挺秀窮荒歎未遭，昔賢吟賞著風騷。縱班盧橘材非偶，不近長安價愈高。煙雨萬株遙若畫，塵埃一騎笑徒勞。瑯盤此日無遺選，品格妍嗤敢自逃。

荔子

劉彥冲

炎蒸午枕夢滄浪，落落星苞喜乍嘗。筆下丹青千

品色釵頭風露一枝香，雞冠借諭何輕許。馬乳爭名固不量，直得當時妃子笑，驪山千古事淒涼。

古詩 以下係龍眼

廉州龍眼實味殊絕可敵荔枝

蘇子瞻

龍眼與荔枝異出同父祖，端如柑與橘未易相可。否異哉西海濱琪樹羅玄圃，纍纍似桃李一一流膏乳。坐疑星殞空又恐珠還浦，圖經未嘗說玉食。遠莫數獨使皴皮生弄色，映瑯俎蠻荒非汝辱。幸免妃子污

律詩

龍眼

劉彥冲

幽株傍擬綠婆娑，豕啞雖微柰美何。香割蜜脾知

韻勝價輕魚目為生多左思賦詠名初出玉局榆
揚論豈頗地極海南秋更暑登盤猶足洗沈疴
詩話

辨蜀都賦

左思蜀都賦云邛竹緣嶺困桂臨崖旁挺龍目側
生荔支故張九齡賦荔支云雖觀上國之光而被
側生之謂老杜亦云側生野岸及江蒲不熟丹宮
滿玉壺雲壑布衣駘背死蓋言臨武勞人害馬翠
眉頰也龍眼惟閩中及南越有之太冲自言十年
作賦三都所有皆貴土物之貢至於言龍目亦不
自知其失也山谷詩注又云生本是厓人字也誤
轉為生



梅實 杏附

羣書要語

標有梅其實七号國風亦果中之嘉

實賦 吳淑梅暴乾為腊羹臙壘中詩 疏

詩句

好折待賓侶金盤薦紅瓊周庚紅綻兩肥梅

四月熟黃梅並杜

齒軟越梅酸韓偓梅熟許同朱

老喫杜絕

永盤未薦含酸子收梅杏半傳黃杜

古今事實

相作鹽梅

高宗命傅說爰立作相曰若作和羹爾惟鹽梅

望梅止渴

魏武帝與軍士失道大渴而無水遂令曰前有梅
林結子甘酸可以止渴士卒聞之皆口中水出遂

得及泉源 世說

梅為曹公

吳人多謂梅子為曹公以嘗望梅止渴也又謂鵝為右軍有士人遺醋梅與燂鵝作書云醋浸曹公一甕湯燂右軍兩隻 筆談

文杏 以下係杏

漢武帝上林苑有文杏謂有文彩也 西京雜記 飾文杏以為梁 司馬長卿賦

董仙杏林

神仙董奉居廬山為人治病重者種杏五株輕者種一株於杏林中以杏一器換穀一器穀少者虎逐之乃以穀賑貧窮號董仙杏林 神仙傳

鄰杏還主

後周張元性廉潔南鄰有杏兩枝杏熟多落元園中元悉以還主

饋杏廢宅

馬燧之子暢以第中大杏饋竇文場文場以進德宗德宗未常見頗恠暢令中使就封杏樹暢懼進宅廢為奉誠園 唐史

古今文集

古詩

古風上蘇子瞻 一首見松門

黃魯直

江梅有佳實託根桃李場桃李終不言朝露借恩光孤芳已皎潔冰雪空自香古來和鼎實此物升

廟廊歲月坐成晚，煙雨青已黃。得升桃李盤，以遠
初見嘗。終然不可口，擲置官道傍。但使本根在，棄
捐果何傷。

律詩

紅梅

羅隱

天賜胭脂一抹腮，盤中磊落笛中哀。雖然未得和
羹，便曾與將軍止渴來。

戲荅晁適道乞消梅

黃魯直

青莎徑裏香未乾，黃鳥陰中實已團。蒸豆作烏鹽
作白，屬聞丹杏薦牙盤。
北客未嘗眉自顰，南人誇說齒生津。磨錢和蜜誰
能許，去帶供鹽亦可人。

古詩 係杏

折杏子

楊廷秀

天暖酒易醺，春暮花難覓。意行到南園，杏子半紅
碧。輕風動高枝，可望不可摘。聳肩歧一足，偶爾攀
翻得。攀條初亦喜，折條還復惜。小苦已自韻，未酸
政堪喫。聊將挿鬢歸，空樽有餘瀝。



葡萄

羣書要語

葡萄結蔭注蔓延而葉密，故多陰。魏
都賦若葡萄之珍，磊落蔓衍乎其側。

古今事實

得種大宛

葡萄出於大宛，張騫所致。有黃、白、黑三種。雜俎又

云李廣利為貳師將軍破大宛得葡萄種歸漢六帖

葡萄為酒

大宛以葡萄為酒富人藏酒至萬餘石久者數十
歲不敗漢使以其實來於是離宮別觀傍盡種葡
萄又

苑中馬乳

太宗破高昌收馬乳葡萄種於苑中南部新書

草龍珠帳

貝丘之南有蒲桃谷天寶中沙門曇霄至此谷
得枯蔓還本寺植之長高數仞蔭地幅員十丈仰
觀若帷蓋其房實磊落紫瑩時人號為草龍珠帳

雜俎

葡萄遺母

唐高祖賜羣臣會於御前有葡萄侍中陳叔達執
而不食上問其故云臣母患口乾求之不能得上
曰卿有母可遺乎遂流涕嗚咽因賜之

古今文集

雜著

示群臣詔

魏文帝

中國珍菓甚多葡萄當其朱夏涉秋尚有餘暑醉
酒宿醒掩露而食甘而不餽為縣切脆而不酸冷而
不寒味長汁多除煩解餽又釀以為酒甘於麴蘖
善醉而易醒道之固已流湊咽唾况親食之耶他
方之果寧有匹者

古詩

蒲桃歌

劉禹錫

野田生蒲桃纏繞一枝高移來碧墀下張王日日
高分歧浩繁縟脩蔓盤結曲揚翹向庭柯意思如
有屬為之立長架布護當軒綠米液漑其根理跡
看滲漉繁葩組綬結懸實珠璣蹙馬乳帶輕霜龍
鱗躍初旭有客汾陰子臨堂瞪雙目自言我晉人
種此如種玉釀之成美酒令人飲不足為君持一
斗徃取涼州牧

律詩

葡萄

韓愈

新莖未徧半猶枯高架支離倒後扶若欲蒲盤堆

馬乳莫辭添竹引龍鬚

葡萄乾

楊廷秀

涼州博酒不勝癡銀海乘槎領得歸玉骨瘦來無
一把向來馬乳太輕肥

葡萄架

楊廷秀

纔喜盤藤捲葉生又驚壓架暗陰成夏寒涼潤青
油幕秋摘甘寒黑水精近竹猶爭一尺許拖鬚先
冒兩三莖今年乞種江西去長是茅齋怯晚晴

櫻桃

羣書要語

楔

音憂

荆桃今櫻桃

亦雅

仲夏天子

蓋先以含桃薦寢廟

月令

高誘注曰

含桃櫻桃為鳥所食故曰含桃

呂氏春秋

惟櫻桃

之為桃先百果而含榮鳥纒食而便墮兩薄灑而皆零後梁宣帝賦櫻桃為樹則多陰為果則先熟

傳咸賦集繁星而積耀柳宗元表

詩句崖蜜亦易求注以為櫻桃杜

古今事實

獻宗廟

漢惠帝出離宮叔孫通曰禮有春嘗菓方今櫻桃可獻願陛下出因取櫻桃獻宗廟諸獻菓自此始

赤瑛盤進

後漢明帝宴羣臣太官進櫻桃以赤瑛盤賜羣臣月下視之盤與櫻桃同色群臣皆笑云是空盤藝

文類聚

賜朱櫻

唐文宗即位因內園進櫻桃以奉三宮太后又景龍文館記上與侍臣於樹下摘櫻桃恣其食末後大陳宴席奏宮樂至暝人賜朱櫻兩籠

品居第三

李直方第菓品以櫻桃為第三國史補

古今文集

雜著

伐櫻桃樹賦

蕭穎士

蕭穎士李林甫採其名欲用之乃召見時穎士屬居母喪即縗麻詣京師徑謁林甫於政事省林甫不識遽見

縷麻大惡之即令斥去穎士大怒乃
為伐櫻桃賦以刺林甫

天寶八載予以前校理罷免降資廣陵太府軍事
任在限外無舍是處寓居于紫極宮之道學館因
領其教職焉廟庭之右有大櫻桃樹高累數尋條
暢蒼蔚攢柯比葉擁蔽風景腹背微禽是焉栖託
頡頏上下喧呼甚適登其喬枝則俯逼軒屏中外
斯隔予實惡之懼盜窺踰因是為資遂命伐焉倣
夫在位者爾

古人有言芳蘭在門不得不鋤眷茲櫻之攸止亦
在物之宜除觀其體異脩直林非棟榦外森沈以
茂密中紛錯以交亂先羣卉以効諂望嚴霜以凋

換綴繁英兮霞集駢朱實以星燦故當小鳥之所
啄食妖姬之所攀翫赫赫闕宇玄之又玄長廊霞
截高殿雲褰實吾君聿脩祖德論道設教之筵宜
乎蔣以芬馥樹以貞堅匪夫松篠桂檜若蘭荃
猗具美其在茲爾何德而居焉擢無庸之瑣質蒙
本枝而自芘汨羣林而非據專廟廷之右地雖先
寢之或薦豈和羹之正味每俯臨乎蕭墻姦回得
而窺伺諒何惡之能為終物情之所畏於是命尋
斧伐盤根密葉剝攢柯焚朝光無陰夕鳥不喧肅
肅明明曠蕩乎堦軒嗟乎草無滋蔓瓶不假器苟
恃勢而將逼雖見親而益忌譬諸人事也則晉吞
併於僭沃魯出逐於強季緜峻擅而吳削倫罔專

而晉墜其大者虎遷趙嗣鸞切齊位由履霜而莫
戒聿堅永而荐至嗚呼乃終古覆車之軌轍豈尋
常散木之足議

律詩

櫻桃

范至能

火齊寶瓔珞垂於綠繭絲幽禽都未覺和露折新
枝

與沈揚二舍人閣老同食勅賜櫻桃翫

物感恩成十四韻

白居易

清曉趨丹禁紅櫻降紫宸驅禽養得熟和葉摘來
新圓轉盤傾玉鮮明籠透銀內園題兩字西掖賜
三臣熒惑晶華赤醍醐氣味真如珠未穿孔似火

不燒人瓊液酸甜足金丸大小勻偷湏防曼倩惜
莫擲安仁已懼長尸祿仍驚數食珍最慙恩未報
飽餵不才身

櫻桃

陳去非

四月江南黃鳥肥櫻桃滿市燦朝輝赤瑛盤裏雖
殊遇何似筠籠相發揮

櫻桃

杜甫

西蜀櫻桃也自紅野人相贈滿筠籠數回細寫愁
仍破萬顆勻圓訝許同憶昨賜露門下省退朝擎
出大明宮金盤玉筋無消息此日嘗新任轉蓬

和張水部勅賜櫻桃

韓愈

漢家舊種明光殿炎帝還書本草經豈似滿朝承

雨露共看傳賜出青冥香隨翠籠擎初重色照銀盤
瀉未停食罷自知無所報空然慙汗仰皇尚

謝楊尚書惠櫻桃

盧延遜

蒲合虛紅怕動搖尚書知重賜櫻桃揉藍尚帶新
鮮葉潑血猶殘舊折條萬顆真珠輕觸破一團茸
露軟含消春來老病尤珍荷併食中腸似火燒

湖南絕少含桃偶人以新摘者見惠感

事傷懷因成四韻

韓偓

時節雖同氣候殊未知堪薦寢園無合充鳳食留

三島誰許鴛偷過五湖苦笋恐難同象七

秦中謂

三月為櫻笋時

酪漿無復瑩蠟珠

湖南無牛酪之

味金鑾歲歲長宜賜忍淚看天憶帝都

答魏衍惠朱櫻

陳無已

開門先得故人書稍喜提携起覆盃得句有誰知
我在嘗新此日賴吾徒傾藍的皜露朝露出袖熒
煌得寶珠會薦瑛盤驚一座覓腸藜口未良圖
詩話

櫻桃薦酪

杜牧之和裴傑新櫻桃詩云忍用烹酥酪從將洗
玉盤流年如可驗何必九華丹遂知唐人已用櫻
桃薦酪也 侯鯖錄

桃實

羣書要語

桃者五木之精也故厭伏邪氣制百

鬼今人作桃符著門以厭邪此仙木

也典術梟桃在樹不落發百鬼本草東海有山名

度索山有大桃實屈盤三千里曰蟠桃山海經桃曰

膽之注桃多毛拭治去膽不聞以黍雪桃宜孔子

不然之也禮記桃之夭夭有蕢其實周南園有桃

國風三桃表櫻胡之別閑居賦

胡桃陳倉胡桃薄皮多肌陰平胡桃大而皮脆草本

詩句鸚鵡啄金桃 王母獻金桃 九重春色醉

仙桃 並杜

古今事實

啖以餘桃

昔者彌子瑕有寵於衛君與君遊於果園食桃而
其以其半啖君君曰忠乎忘其口而啖寡人及彌

子瑕色衰愛弛得罪於君君曰是嘗啖我以餘桃
韓子

先黍後桃 見黍門

二桃殺三士

齊景公有勇士三人恃功恣行天下公患之晏子
曰可賜二桃令計功而食三士初爭後讓皆自殺
反桃故曰二桃殺三士

方朔竊桃

東都獻短人帝呼東方朔朔至短人謂上曰王母
種桃三千歲一子此子不良已三過偷之矣後西
王母以七月七日降帝宮命侍女索桃須臾已至
盤盛桃七枚母曰噉二以五枚與帝帝留枚著前

母曰用此何爲上曰欲種之母笑曰此桃三千年一著子非下土所植

漢武故事

漢武得種

漢武帝上林苑有細桃紫文桃金城桃霜桃

西京雜記

劉阮採桃

漢永平中劉晨阮肇入天台迷不得返經十三日飢甚遙望山上有桃遂躋險接葛至其下噉數枚飢止體充下山取水見一杯流下有胡麻焉乃相謂此近人矣遂度山見大溪溪邊有二女子色甚美見二人持杯便笑曰劉阮二郎投向杯來劉阮驚二女欣然曰來何晚耶因邀還家至十日求遂苦留半年女遂相送指示還路鄉邑零落已七世

矣

搜神記

求種不得

桓崖在京下有桃桓玄就求不得佳者玄曰德之休明則肅慎貢其楛矢如其不爾籬壁間物亦不可得也

世說

古今文集

雜著

桃賦

晉傅玄

有東園之珍菓兮承陰陽之靈和結彙根以列樹兮艷長畝而駢羅夏日先熟而進廟堂辛氏踐秋厥味益長亦有冬桃冷伴冰霜放神適意恣口所嘗華升御於內庭兮飾佳人之令顏實充虛而療

飢兮信功烈之難原嘉放牛於斯林兮悅萬國之
又安望海島而慷慨兮懷度朔之靈山何茲樹之
獨茂兮條枝紛而麗閑根龍虬而雲結兮彌千里
而屈盤禦百鬼之妖慝兮列神荼以司姦辟凶邪
而濟正兮豈惟榮羨之足言



李實

李樹

李並附

羣書要語

種別類分或朱或黃

傳元賦

沉朱李

於寒水

魏文帝書

柰二柰耀白丹之色

潘岳賦

素柰夏成

蜀都賦

又

有青赤白三種張掖有白柰酒泉有赤柰

廣志

詩句

君子防未然不處嫌疑間瓜田不納履李下

不整冠

顏延年

色潤房陵縹味奪寒水朱

沈約

盤

根植瀛海交榦倚橫天

唐太宗

仙李盤根大

杜元

皇廟

永盤夏薦碧實脆

韓

古今事實

糟食李實

匡章曰陳仲子豈不誠廉士哉居於陵三日不食
耳無聞目無見井上有李糟食實者過半矣陳仲
子匍匐往食之三咽而後耳有聞目有見也

崑崙玉李

五原蔡縱入山而還其家人云到崑崙山有玉李
形如世間者但光明洞徹而堅以玉井水洗之便
軟而可食

抱朴子

漢武得種

漢武初脩上林苑遠方獻名果有朱李黃李紫李
綠李青李綺李青房李西京雜記

道旁苦李

王戎年七歲嘗與諸小兒遊賭道邊李樹有子折
枝諸小兒競走取之惟戎不動人問之答曰樹在
道邊而多子此必苦李也取之信然世說

房陵佳李

房陵朱仲有李園三十六所述異記

啖李伐樹

和嶠性至儉家有好李求之不過數十王濟候其
上直率少年詣園共啖畢伐樹送一車枝與和公
唯笑而已本傳和嶠諸弟徃園中食李而皆計核

貴錢故嶠婦弟王濟伐之也語林

賣李鑽核

王安豐有好李常賣之恐人得種常鑽其核世說
來禽致子

王羲之帖云青李來禽櫻桃日給藤子皆囊盛為
佳函封多不生足下所疏云此果佳可為致子當
種之吾篤喜果今在田里惟以事故速為致此子
者則大惠也洪王父云來禽以味甘求眾禽也

名嘉慶子

東都嘉慶坊有李樹其實甘鮮為京都之美故稱
嘉慶李今人但言嘉慶子蓋稱謂既熟不加李亦
可記也韋述兩京記

指李為姓

以下係李樹

老子之母適到李樹之下生老子老子生而能言指李樹曰以此為我姓神仙傳

博勞集樹

東方朔與弟子俱行朔渴令弟子叩道邊家門而不知室主名呼不應朔復往見博勞飛集其家李樹上朔謂弟子曰主人當姓李名博汝呼當應室中人果有姓李名博出與朔相見即入取飲與之東方朔占

柰實冬生

以下係柰

曹植謝賜表即夕殿中虎賁宣詔賜臣等冬柰一奩以柰夏熟今則冬生物以非時為珍恩以絕口

為厚詔報曰山柰涼州來云云

抱樹護柰

王祥後母庭中有柰樹始著子使祥守視晝驅鳥雀夜警蟲鼠時雨忽至祥抱樹至曙母見之惻然孝子傳

兒不顧柰

楊愔四世同居庭有柰樹實落于地群兒咸爭愔獨坐不顧季父見之曰此兒恬裕有我風三國典略

兒不敢嘗

王僧孺五歲父友有饋其父延年柰者先與僧孺僧孺曰大人未見不敢先嘗不受之

共食白柰

袁本初時有神出河東號度索君兗州蘇氏母病
往禱見一人布衣高冠謂度索君曰昔廬山共食
白柰未久已三千年日月易流使人悵然去後度
索君曰此南海君也 神仙傳

古今文集

律詩

嘉慶李

白居易

來都綠李萬州栽君手封題我手開把得欲嘗先
悵望與渠同別故鄉來

人面子

楊廷秀

喜時能笑醉能歌眉映青山眼映波舊日羨如潘
騎省只今瘦似病維摩

來禽

劉彥冲

粲粲來禽已著花芳根誰徙向天涯好尋青李相
遮映風味應同逸少家

新編古今事文類聚卷之八十六

建安祝穆和父編

菓實部



菱 芡附

羣書要語

菱蔭也 說文 芡即菱也 楚詞注 菱花

筆記 開背日芡花開向日菱寒而芡暖 地仇

筆記 鉅野大於常菱淮漢以南凶年以菱為蔬猶

以橡為資也 廣志 鳧躍漸啜菱芡 潘岳西征賦

詩句 紫菱生軟角 庚信 水果剥菱芡 杜 採菱寒刺

上 杜 菱葉亂生萍 韓 菱翻紫角利 韓

菱雞頭也 說文

詩句 剥芡珠走盤 山谷 蝟毛蒼蒼礫不死銅盤蠹

蠹釘頭生 吳雞鬪敗絳幘碎海蚌扶出真珠明

梅聖俞明珠論斗煮雞頭山谷

古今事實

嗜芰

屈到嗜芰有疾召其宗老而屬之曰祭我必以芰及祥宗老將薦芰屈建命去之曰夫子不以私欲干國之典也 國語

製芰衣

屈原製芰荷以為衣 楚辭

益蓄菱芡

龔遂為渤海太守勸民秋冬益蓄果實菱芡

獺著芰衣 見獺門

古今文集

雜著

論屈建文

孫楚

加籩之品菱芡存焉楚多陂塘菱芡所生父自嗜之而抑按宰祝既毀就養無方之禮又失奉死如生之義奪乎素欲建何忍焉

食老菱有感

楊廷秀

幸自江湖可避人懷珠韞玉冷無塵何須抵死露頭角荇葉荷花老此身

七月望觀菱濠

楊廷秀

言濠水落兩三痕正走秋初雨後天菱荇中間開

一路曉來誰過採菱船

菱沼

楊廷秀

柄似蟾蜍股樣肥，葉如蝴蝶翼相差。蟾蜍翹立蝶
飛起，便是菱花著子時。

食菱

楊廷秀

雞頭吾弟藕吾兄，頭角嶄然也不爭。白璧中藏煙
水晦，紅裳左袒雪花明。一生子木非知己，千載靈
均是主盟。每到炎官張火傘，西山未當聖之清。

古詩

傳茨

初食雞頭有感

歐陽永叔

六月京師暑雨多，夜夜南風吹芡觜。凝祥池鎖會
靈園，僕射荒陂安可擬。爭先園客採新苞，剖蚌得

珠從海底都城百物貴，新鮮厥價難訓與。珠比金
盤磊落何所薦，滑臺潑醅如玉醴。自慙竊食萬錢
廚，滿口飄浮嗟病齒。却思年少在江湖，野艇高歌
菱荇裏。香新味全手自摘，玉潔沙磨軟還美。一瓢
固不羨五鼎，萬事適情為可喜。何時遂買穎東田
歸去，結茅臨野水。

食雞頭

蘇子由

芡葉初生細如縠，南風吹開輪脫輻。紫苞青刺攢
蝟毛，水面放花波底熟。森然赤手初莫近，誰料明
珠藏蒲腹。剖開膏液尚模糊，大盜磨聲風雨速。清
泉活火曾未久，滿堂坐客分升掬。紛然咀噍惟恐
遲，勢若群雛方脫粟。東都每憶會靈沼，南國陂塘

種無足東遊塵土未應慊此物於來日常食
律詩

食雞頭

楊廷秀

龍宮失曉惱江妃也養鳴雞報早暉要啄稻梁無
半粒只教滿額飽珠璣

食雞頭子

楊廷秀

江妃有訣煮真珠熬飯牛酥軟不如手擘雞頭金
五色盤傾驪頷珠千餘夜光明月供朝嚼水府靈
宮恐夕虛好與藍田食玉法編歸辟穀赤松書
三危瑞露凍成珠九轉丹砂鍊久如鼻觀温芳炊
桂歇齒根軟熟剥胎餘半甌鷹爪中秋近一炷龍
涎丈室虛却憶吾廬野塘味蒲山柿葉正堪書

詩話

芡名鴈頭

周禮注芡雞頭一名鴈頭退之聯句云鴻頭刺刺
芡山谷云剖蚌煮鴻頭蓋用此也



蓮實 藕附

羣書要語

蓮荷實也一曰葍藪說文藕荷根也

一曰葍乃莖下白莖在泥中者同上

其實蓮其根藕其中葍葍中薏小雅葍五月中生
生敬脆至秋表皮黑葍成可食或可磨以爲飯輕
身益氣令人強健詩疏

詩句

池蓮拆秋房

韓

青房圓實齊戢戢

張籍

露冷

蓮房墜粉紅

杜

踏藕野池中

杜

佳人雪藕絲

杜

燕用乾藕子

後唐馬郁為秘書監時張承業權貴任事與客宴集陳列珍果客無敢先嘗郁食之必盡承業私戒主者它日郁至惟以乾藕子置前而已郁知不可啖譚中出一鐵錐搗碎而食之承業大笑為公易之云勿敗吾案 續世說

古詩

穎上食蓮有感

黃魯直

蓮實大如指分甘念母慈共房頭臍臍更深兄弟思實中有么荷拳如小兒手令我憶衆雛迎門索

黎棗蓮心政自苦食苦何能甘甘食恐腊毒素食則懷慙蓮生淤泥中不與泥同調食蓮誰不甘知味良獨少吾家雙井塘十里秋風香安得同袍子歸製芙蓉裳

律詩

蓮房

司馬君實

蓮房前後熟供噉不須齊肉嫩山蜂子稜深天馬蹄尚連餘蘂在深映亂荷低脆羨如新來近根猶帶泥

古詩

係藕

山谷坐上分題賦藕

胡致隆

平生冰雪姿七星羅心曾豈無有絲毫上裨天子

聰而不自薦達胡為乎泥中沉疴正無賴安得君
從容其子亦可憐風味如乃翁

藕

揚廷秀

荷衣芟製雪為容家住雲煙太華峯外面看來真
璞玉肖中琬出許玲瓏



石榴

羣書要語

若榴石榴也

廣雅

若榴競製

蜀都賦

其在晨也灼若九日棲扶桑其在夕

也爽若燭龍吐潛光

傳玄賦

丹暉綴於朱房細的

點乎紅鬚

潘岳河陽庭前石榴賦

千房同模十子如一

潘岳賦

剖之則珠散含之則永釋

張載賦

詩句

紅榴罇玉房

山谷

庭榴剖朱實

江總

海榴紅

簇錦窠白

元稹

古今事實

張騫得種

陸機與弟雲曰張騫為漢使外國十八年得塗林

安石榴種

博物志

獻安石榴

晉安帝時武陵臨沅獻安石榴一蒂六實

沈約宋書

石榴多子

北史齊安德王延宗納趙郡李祖收女為妃母宗
氏薦二石榴於帝莫知其意帝問魏收答曰石榴
房多子王新昏妃母欲子孫衆多帝大喜

古詩

石榴

范至能

日烘古錦囊露浥紅瑪瑙玉池燕清肥三彭跡如
埽

石榴

梅聖俞

榴枝苦多雨過熟坼已半秋雷石罌破曉日丹砂
爛任從雕俎薦豈待霜刀判張騫西使時蜀醬同
歸漢

石榴歌

莊布

玳瑁殼皴枝婀娜馬牙硝骨綿敷裹霜風擊破錦
香囊鸚鵡啄殘紅豆顆美人擎在金盤腹錯認海

螺班碌碌蒲口常含瓊液耳一堂齒冷敲寒玉

石榴歌

皮日休

蟬噪秋枝槐葉黃石榴香老愁寒霜流霞包染紫
鶯粟黃蠟紙裹紅瓠房玉刻冰壺含露濕爛斑似
帶湘娥泣蕭娘初嫁嗜甘酸嚼破水精千萬粒
律詩

石榴

鄭獬

高枝重欲折霜老拆丹膚試剖紫金椀滿堆紅玉
珠根雖傳大厦種必近仙都題作江南信人應賤
橘奴

石榴

楊廷秀

深著紅藍染暑裳琢成紋玳敵秋霜半含笑裏清

水齒忽綻吟邊古錦囊霧縠作房珠作骨水精為醴玉為漿劉郎不為文園渴何苦星槎遠取將

石榴

劉彥冲

庭榴結實熟芳叢一夜飛霜染茜容萬子同包無異質金房玉隔謾重重



棗

羣書要語

臧酸棗

孟子養其樹棘

今江東棗大

而銳上者呼為壺棗猶瓠也細腰者

今鹿盧棗

小雅

棗有狗牙雞心牛頭羊角獼猴細

腰之名

廣雅

八月剥棗

七月

饋食之邊其實棗

婦人之贄相捺脯脩棗栗

禮記

安邑千樹棗其人

與千戶侯等

貨殖傳

棗膏昏鈍

范蔚宗香譜

凡棗

味之美莫如安邑之御棗也

魏文帝詔

信都之棗

魏都賦

棗下纂纂朱實離離宛其死矣化為枯枝

人生不能行樂何以虛謚為

潘岳笙賦

詩句

齊下何攢攢榮華各有時棗欲初赤時人從

四邊來棗適今朝賜誰能仰視之

李善賦注

皮皴

似龜手葉小如鼠耳

樂天

庭前八月梨棗熟一日

上樹能千迴

杜

古今事實

棗大如瓜

李少君以却老方見上少君曰臣嘗游海上見安

期生食巨棗大如瓜

漢郊祀志

棗實如瓶

尹喜共老子西遊省太真王母共食王文之棗其實如瓶

尹喜內傳

海棗不實

齊景公謂晏子曰東海之中有棗華而不實何也晏曰昔者秦穆公乘舟理天下黃布褰蒸棗至海而拯其布破蒸棗故華而不實公曰吾佯問子對曰嬰聞佯問者佯對也

晏子春秋

嗜羊棗

曾皙嗜羊棗曾子不忍食羊棗

實小而負紫黑色俗呼羊矢棗

棗栗濟飢

秦飢應侯謂王曰五苑之棗栗請發與之

覆射棗

武帝時上林獻棗上以枝擊未央前殿檻呼朔曰叱來叱來先生知此篋中何物朔曰上林之棗四十九枚上曰何以知之朔曰呼朔者上也以枝擊檻兩木林也曰朔來朔來者棗也叱叱者四十九也上大笑賜帛十疋

伐棗去婦

見出妻門

以棗塞鼻

見廁門

周文之棗

周文弱枝之棗

潘闕居賦

棗投栗報

梁蕭琛嘗侍宴醉伏上以棗投琛琛乃取栗擲上中面中丞在席帝動色曰此中有人不得如此豈

有說也琛曰陛下按臣以赤心臣敢報之以戰栗

古今文集

古詩

棗

後秦趙整

北園有一樹布葉垂重陰外雖多棘刺內實有赤心

棗

梁簡文帝

浮華齊水麗垂彩鄭都奇白英紛靡靡紫實標離
離風搖羊角樹日映雞心枝穀城踰石蜜蓬岳表
仙儀已聞安邑美永茂王門垂

賦棗

王介甫

種桃昔所傳種棗予所欲在實為羨果論材又良

木餘甘入鄰家尚得饒婦逐况余秋盤中快噉取
饜足風包墮朱繒日顯皺紅玉贄享古已然函詩
自宜錄紉懷青齊間萬樹蔭平陸誰云食之昏匿
智乃成俗廣庭觴聖壽以此參肴藪願比赤心投
皇明儻予燭



瓜 木瓜附

羣書要語 秩約其紹秩 小雅 綿綿瓜秩 注瓜秩

小瓜子其李子小 七月食瓜 七月五

月乃瓜者治瓜之辭也八月剥瓜者蓄瓜之時也
大戴禮 為天子削瓜者副之巾以絺 副既削又四
之而中 為國君者華之巾以絺 華中斷不
覆焉 為大夫 為大夫
者累之 累俱也謂士寬之 不中裂橫斷 庶人齧之
去寬而已

不橫斯婦人之贊瓜桃李梅同上委人掌蓄聚物

瓜瓠芋地宮吾豈匏瓜也哉焉能繫而不食語浮

甘瓜於清泉魏文帝與吳質書得冷而益甘兮怡

神爽而解顏傳元賦其類則有栝樓定桃黃瓠白

縛金叉蜜甯小青大班玄斝素椀狸首虎踏陸機

瓜賦承之以雕盤幕之以織絺甘逾蜜房冷亞永

圭魏劉植賦瓜疇芋區蜀都賦辰日宜種瓜山谷詩注

破瓜霜落刃落刃嚼冰霜瓜嚼水晶寒

並杜秋瓜未落蒂瓜畦爛文貝並韓霜蔓絕寒

瓜柳翠瓜碧李沉玉甃杜

木瓜投我以木瓜衛風

古今事實

芸瓜忤父

曾子芸瓜而誤斬其根曾皙怒大杖擊其背曾子仆地有頃乃蘇孔子聞之告門弟子曰參來勿納也曾子使人請孔子孔子曰舜之事瞽叟得小捶則受大杖則走今參事父委身以待暴怒身死陷父於不義不孝孰大焉家語

瓜時而代見交代門

視瓜坑儒

秦始皇密令人種瓜於驪山硯谷中溫處瓜實成使人上書曰瓜冬實有詔下博士諸生說之人人各異則皆使往視之而為伏機諸儒生皆至方相難不決因發機從上填之以土皆壓死衛宏古文奇字序

東陵種瓜

邵平故秦東陵侯秦滅後為布衣種瓜長安城東種瓜有五色甚羨故世謂之東陵瓜又云青門瓜青門即東陵也史

鄰瓜羨惡

梁大夫宋就為邊縣令與楚隣界梁楚邊亭皆種瓜梁亭斂力數灌其瓜美楚人窺而希灌其瓜惡楚令以梁瓜之美怒因往夜竊搔梁瓜梁覺之欲往報搔楚瓜宋就曰是構怨之道也乃令人夜往竊為楚灌瓜楚且往則已灌瓜伺而察之則梁亭為也楚令大悅因具聞楚王楚王乃謝以重幣故梁楚之驩由宋就也賈誼新書

王母仙瓜

西王母謂上元夫人曰朱陵山食靈瓜其味甚好憶此味久已七千歲矣漢武內傳

設瓜得墓

孫鍾家貧種瓜瓜熟有三人來乞瓜鍾設瓜及飯謂鍾曰蒙君厚惠乃示子葬地鍾後生權權生亮亮生休酉真錄

種瓜自給

吳步騭避難江南單身窮困種瓜自給

盜瓜知愧

晉桑虞家園瓜熟有人踰園盜之虞見以園籬多棘刺使人為開道及盜負出見道通知虞使除之

乃送瓜叩頭請罪虞與之

三莖一實

晉武太康八年王濟園生瓜三莖一實

異苑

削瓜侵肉

後周王羅嘗與客食瓜客削瓜皮侵肉頗厚羅意嫌之及瓜皮落引手就地取而食之客有愧色

寒瓜遺母

滕曇恭年五歲母患熱病思食寒瓜土俗不產曇恭歷訪而不得俄過一桑門曰我有雙瓜分一相遺舉家驚異

南史

猷瓜授官

陸贄帝幸梁道有猷瓜果者帝嘉其意欲授以試

官贄曰爵位天下公器不可輕也今猷瓜一器果

一盛則受之彼忘軀命者何勸哉

逐兔踐瓜

唐酷吏王弘義賤時求傍舍不與及為御史騰文園有白兔縣為集人捕逐哇無遺蔬李昭德曰昔聞蒼鷹獄吏今有白兔御史

蠅集瓜上

見蠅門

坐上種瓜

馬湘有道術嘗於江南刺史馬植坐上以酒杯盛土種瓜須臾引蔓花實食之甚美

續仙傳

饅瓜念舊

呂文穆蒙正在龍門讀書一日行伊水上見賣瓜

者意欲得之無錢其人偶遺一枚公悵然取食之
後作相買園洛城東南下直伊水起亭以饅瓜爲
名不忘貧賤也聞見錄

古今文集

古詩

甘瓜

范至能

夏膚麤已皴秋蒂熟將脫不辭抱蔓歸聊慰相如
渴

園人送瓜

杜甫

江間雖炎瘴瓜熟已不早傾筐蒲鵠青滿眼顏色
好沉浮亂水玉愛惜如芝草

律詩

致中惠瓜成二絕

劉彥冲

故人夙有瓜畦約走送筠籃百里間翠瓠瓊嬰纔
一握極知風味勝黃斑

柘漿溜溜香浮玉蘇水沉沉色弄金那似甘瓜能
砂暑一盤霜雪沍清襟

食瓜有感

黃魯直

暑軒無物洗煩蒸百果凡材得我憎
蘇井筠籠浸蒼玉金盤碧筋薦寒冰
田中誰問不納履坐上適來何處蠅
此理一杯分付與我思明哲在東陵

古詩

係木瓜

木瓜

范至能

沉沉黛色濃慘慘金沙洵却笑宣州房
鏡作紅粧

面
律詩

野店多賣木瓜

楊廷秀

天下宣城花木瓜日華露液繡成花何須埃子強
呈界自有瓊瑤先報衙



柿

羣書要語

朱柿

王逸賦

鴻柿若瓜

李尤七款

古今事實

烏柀八稜

梁侯園有烏柀八稜

地理志又見潘岳

古今文集

律詩

柀柿

劉彥冲

秋林黃葉晚霜嚴熟蒂甘香味獨兼火傘頰虬浪
裊拂風標却似邑中黔



梨 查附

羣書要語

真定郡梨大如拳甘若蜜脆若菱可

以解煩結

魏文詔

淮北滎南河濟之

間千株梨其人與千戶侯等

食貨志

紫梨津潤

蜀都

賦梨曰快果

本草

詩句

紫實已含津

梁宣帝

張梨不外求

山梨結

小紅

查梨且綴碧

紅梨迥得霜

正杜

蒙君知

重惠瓊實薄起金刀釘玉深

辛賈遜

嚼麴春冰敲

齒冷燕時雪夜沃心寒

前人

共食紫梨

老子西遊省太真王母共食紫梨

尹喜內傳

含消梨

漢武帝園有大梨如五升落地則破欲取則以布囊承之名曰含消梨

辛氏三秦記

食取小梨

孔融兄弟七人第六年七歲與諸兄食梨輒取小者人問其故答曰小兒性當取小者

張公梨

洛陽北郊張公夏梨海內惟一樹潘岳賦云張公大谷之梨

好梨不蒸

桓南郡每見人不快輒真曰君得哀家梨當復不蒸食不舊語秣陵有哀仲家梨甚美大如升入口即消釋言愚人不別味得好梨蒸食之也

世說

釘坐梨

崔遠人號為釘坐梨

梨號刀斧

李建勳罷相江南出鎮豫章一日遊西山田間茅舍有老叟教授村童公觴于其廬連食數梨賓僚有曰梨號五臟刀斧不宜多食叟笑曰鵲冠子云五臟刀斧乃離別之離非梨也蓋離別戕伐曾懷有若刀斧遂就架取小冊振拂以呈丞尉乃鵲冠

子東軒

樹下楊妃

玄宗至馬嵬驛令高力士縊貴妃於佛堂前之梨樹唐史

查難比梨係查

南史宋張敷小名檀父小名梨文帝戲曰檀何如梨答曰梨是百果之宗檀何敢比

古今文集

律詩

讀歎侯傳

陸務觀

萃謂當年已誤來商山芝老更堪哀人生若要常無事兩顆梨須手自栽

梨

劉彥冲

尚想飛花映綺疏離離秋實點塵蕪丹腮曉露香猶薄玉齒寒冰嚼欲無舊有佳名傳大谷誰分靈種下仙都拓槩不用傳金碗猶得相如病少甦

食梨

朱元晦

珍實渾疑露結成香葩况是雪儲精乍驚磊落堆盤出旋剖輕盈照骨明盧橘謾勞誇夏熟拓槩未許析朝醒啖餘更檢桐君錄快果知非浪得名

梨

楊廷秀

掛冠大谷肯干時飢坐風流特地奇骨裏馨香衣不隔臂中冰雪齒先知賣漿碎擣瓊為汁解甲方怜玉作肌老子醉來渾謝客見渠倒屣只嫌遲

詩話

帝為燒梨

唐肅宗嘗夜坐召穎王等三弟同於地爐列毯上坐時李泌絕粒上每自燒梨以賜之穎王恃恩固求上不與曰汝常飽肉食先生絕粒何乃爭之穎王曰臣等試大家心何乃偏耶不然三弟共乞一顆可乎上亦不許賜以它果穎王等又曰臣等以大家自燒故乞他果何用因曰先生恩渥如此臣等請聯句以為他年故事穎王曰先生年幾許顏色似童兒信王曰夜抱九仙骨朝披一品衣一王曰不食千鍾粟唯食兩顆梨既而三王請上成之上曰天生此間氣助我化無為

新編古今事文類聚卷之八十六

新編古今事文類聚卷之八十七

建安祝穆和父編

菓實



羣書要語

隰有栗山樞樹之榛栗定之方中饋

食之遵其實栗周禮女贄不過榛栗

棗脩左傳燕秦千樹栗其人與千戶侯等漢書中

山好栗何晏論東夷韓國出大栗如梨魏志榛栗

罇發蜀都賦

詩句穰多栗過拳杜山家蒸栗暖杜羅生雜橡栗

採栗玄猿窟韋應物歲拾橡栗隨狙公杜園收

芋栗不全貧杜

古今事實

狙公賦芋

栗也見狙門

報以戰栗

見棗門

擲栗卜郡

宋劉秀之為丹陽尹先是秀之從叔穆之為丹陽與子弟廳事上寘廳事柱有一穿穆之謂曰汝等試以栗遙擲柱入穿者必得此郡唯秀之入焉其言果驗

世說

兒不爭栗

王泰之幼敏悟年數歲時祖母散栗於床群兒競之泰獨不取問其故對曰不取當自得賜由是中表示異之

世說

栗綴於鼻

道人殷七七名文祥能造逡巡酒開頃刻花嘗一官僚召飲取栗散於官妓皆聞異香唯笑七七者栗綴於鼻不可脫但聞臭湏臾狂舞粉黛狼籍兵為陳過栗乃墜

續仙傳

古今文集

律詩

栗

蘇子由

老去自添腰脚病山翁服栗舊傳方客來為說晨興晚三咽徐收白玉漿

本草云人有脚弱啖栗數升遂能起行



橘金橘 枳枳殼

羣書要語

淮海惟揚州厥包橘柚錫貢孔安國

疏小曰橘大曰柚禹貢橘踰淮而北

為枳此地氣然也周禮蜀漢江陵千樹橘其人與

千戶侯等食貨志橘白華赤實皮馨香有味異物

志南方有橘酢正裂人牙時有甜耳魏文詔夫樹

粗梨橘食之則美嗅之則香淮南柚梨橘粗皆可

於口也莊子斬伐橘柚列樹苦桃離騷果之美者

雲夢之柚呂氏春秋碧葉獨潤金衣更鮮李德裕

詩句天寒橘柚垂杜么橘委金丸山谷莫遣兒童

酸打盡要看霜後十分黃山谷

金橘其實小如彈黃如金謂之金橘花果錄

詩句金衣非所怪沈休珍重更過三十子不堪分

付野人邊陸龜蒙

柑真柑一名乳柑惟泥山為最地不彌一里所產

柑其大六七寸圍皮薄而味珍脉不粘瓣食不留

滓一顆之核纔一二間有全無者韓愈直生枝柑

鄉人以其耐久留之枝間俟其味變甘帶葉而折

故名生枝同上甘踰萍實冷亞永壺梁劉孝儀

詩句白露溥柑子杜破柑霜落爪杜

棖棖子木有刺香氣馥馥可以熏袖可以茗鮮可

以漬蜜真佳實也同上

詩句霜橙壓香橘杜

古今事實

橘中之樂

巴邛人家有橘園霜後橘盡收斂有大橘如三斗

盜巴人異之剖開每橘有二叟鬚眉皓然肌體紅明皆相對象戲談笑自若一叟曰橘中之樂不減商山但不得深根固蒂為愚人摘下耳

由怪錄詳見神仙門

帶十二寶

平西將軍庾亮送橘十二寶共一帶為瑞異羣臣畢賀

漢武故事

懷橘遺母

陸績年六歲於九江見袁術術出橘績懷三枚去拜辭墮地術謂曰陸郎作賓客而懷橘乎績跪答曰欲歸遺母術大奇之

橘葉治病

蘇耽種橘鑿井以救鄉里之有病者以井泉服一

橘葉即已

神仙傳

羲之橘帖

王羲之帖云奉橘三百枚霜未降未可多得

賜羣臣橘

唐蓬萊殿九月九日賜羣臣橘

金橘後出

金橘產於江西以遠難致都人初不識明道景祐初始與竹子俱至京師竹子味酸人不甚喜後遂不至而金橘香清味美置之樽俎間光彩的皜如金彈丸誠珍果也都人初不甚貴後因溫成皇后尤好食之由是價重京師余世家江西見吉州人甚惜此果其欲久留著於菘豆中藏之可經時不

變云橘性熱而豆性涼故能久也

歸田錄

柑缺一瓣以下係相

明皇食柑凡千餘枚皆缺一瓣問進柑使者云中
塗嘗有道士嗅之蓋羅公遠也

開元遺事

廉不受柑

丹陽張磐為廬江太守尋陽令嘗餉一奩柑其小
男七歲就取一枚磐奪取付外卒以兩枚與之磐
奪兒柑鞭卒

謝承

後漢書

羲之柑帖

王羲之帖奉柑二百不能佳

布裹柑子

益州歲進柑子皆以紙裹之他時長吏嫌紙不敬

代之細布既而恐柑子為布所損每懷憂懼俄有
御史甘子布至長吏以為推布裹柑子事懼曰果
為所推及子布到驛長吏叙以布裹柑子為敬子
布初不之知久而方悟聞者莫不大笑

唐新語

千頭木奴

李衡字叔平為丹陽太守每欲治家妻輒不聽後
密遣十人於武陵龍陽洲上作宅種柑千樹臨死
勅兒曰汝毋惡吾治家故窮如是吾州里有千頭
木奴不責汝衣食歲止一疋亦足用矣及衡柑成
歲得輸絹數千疋

襄陽記

柑果懷爛

王丞相儉帳下柑果盈溢涉春壞爛

郭子

上元傳柑 見上元門

古今文集

雜著

黃甘陸吉傳

蘇子瞻

黃甘陸吉者楚之二高士也黃隱於泥山陸隱於
蕭山楚王聞其名遣使召之陸吉先至賜爵左庶
長封洞庭君尊寵在群臣右久之黃甘始來一見
拜溫尹平陽侯班視令尹吉起隱士與甘齊名入
朝久尊貴用事一旦吉位居上甘心銜之郡臣皆
疑之會秦遣蘇軫鍾離意使楚楚召燕章華臺群
臣皆與甘坐上坐吉拂然謂之曰請與子論事甘
曰唯唯吉曰齊楚約西擊秦吾引兵踰關身犯霜

露與枳棘最下者同甘苦率家奴千人戰甘洲之
上拓地至漢南而歸子功孰與甘曰不如也曰神
農氏之有天下也吾剝膚刻肝怡顏下氣以固蒂
之術獻上上喜之命記注官陶洪景狀其方略以
付國史出為九江守宣上德澤使童兒亦懷之子
才孰與甘曰不如也吉曰是二者皆出吾下而位
吾上何也甘徐應之曰君何見之晚也每歲太守
勸駕乘傳入金門上玉堂與虞荔申振梅福棗嵩
之徒列侍上前使數子者口呿舌縮不復上齒牙
間當此之時屬之於子乎屬之於我乎吉默然良
久曰屬之於子矣甘曰此吾所以居子之上也於
是羣臣皆伏歲終吉以疾免更封甘子為穰侯吉

之子爲下邳侯，穰侯遂廢之。顯下邳以美湯藥宮，至陳州治中。

太史公曰：田文論相，吳起說相如回車廉，頗屈姪。何弊衣尹姬，悔甘吉亦然。傳曰：女無好惡，入宮見如士，無賢不肖，入朝見嫉。此之謂也。雖美惡之相，遼嗜好之不齊，亦焉可勝道哉。

橘頌

屈原

后皇嘉樹，橘徠服兮。受命不遷，生南國兮。深固難徙，更壹志兮。綠葉素榮，紛其可喜兮。曾枝剡棘，圓果搏兮。青黃雜揉，文章爛兮。精色內白，類可任兮。紛緼宜脩，姱而不醜兮。

古詩

病橘

杜甫

伊橘少生意，雖多亦奚爲。惜哉結實小，酸澁如棠梨。剖之盡蠹蝕，採掇爽所宜。紛然不適口，豈止存其皮。蕭蕭半死葉，忽忽別故枝。玄冬霜雪積，況乃回風吹。嘗問蓬萊殿，羅列瀟湘姿。此物歲不稔，玉食失光輝。寇盜尚憑陵，當君減膳時。汝病是天意，吾意罪有司。憶昔南海使，奔騰獻荔枝。百馬死山谷，到今耆舊悲。

律詩

故人重九日求橘戲贈

韋應物

憐君病後思新橘，始摘猶酸亦未黃。書後欲題三百顆，洞庭猶待滿林霜。

田園雜興

范至能

新霜徹曉報秋深，染盡青林作纈林。惟有橘園風景異，碧叢叢裏萬黃金。

和賜後苑金橘

李邦直

苑臣初摘置瑤盤，口勅宣恩賜近官。氣味豈同淮枳變，皮膚不作楚梅酸。參差翠葉藏珠琲，錯落黃金鑄彈丸。安得一株擎雨露，畫圖傳與世人看。

歐陽從道許寄金橘以詩督之

黃魯直

從道參禪有言，向來頗聞數從歌舞飲，故及之。

禪客入秋無氣息，想依紅袖醉氍毹。霜枝搖落黃金彈，許送筠籠殊未來。

雜著

以下係柑

謝湘東王賚柑啓

梁庾肩吾

名傳地理，遠自武陵之淵。族茂神經，遙聞建春之嶺。王逸爲賦，取對荔枝。張衡製辭，用連石蜜。足使萍實非甜，蒲萄猶餽。王羲之與諸子遊觀，有一味甘，割而分之，以娛目前。云云。

甘雨

杜甫

春日清江岸，千甘二頃田。青雲著葉密，白雪避花繁。結子隨邊使，開筒近至尊。後於桃李熟，終得獻金門。

柳州城北種柑

柳宗元

手種黃柑三百株春來新葉徭城隅方同楚客憐
皇樹不學荊州利木奴幾歲開花聞噴雪何人摘
實見垂珠若教坐待成林後滋味還堪養老夫

食柑

蘇子瞻

一雙羅帕未分珍故事賜近臣黃柑以黃羅帕包之林下先嘗愧
逐臣露葉霜枝翦寒碧金盤玉指破芳辛清泉漱
漱先流齒香霧霏霏欲喫人坐客慙慙為收子千
奴一掬為吾貧

根子

以下係根

歐陽永叔

嘉樹團團俯可攀壓枝秋實漸爛斑朱欄碧瓦清
霜曉粲粲繁星綠葉間

贈景文

蘇子瞻

荷盡已無擎雨蓋菊殘猶有傲霜枝一年好景君
須記正是根黃橘綠時

根

劉彥冲

根橘甘酸各效能南苞錫貢不同升果中亦抱遺
才嘆有客攀條氣拂膺

食橙寄謝舍人

梅聖俞

洞庭朱橘未弄色襄水錦根多已黃玉白搗齏憐
鱸羹金盤按酒助杯香雖生南土名猶重未信中
州客厭嘗欲寄百苞憑驛去只應佳味怯風霜

枇杷

羣書要語

枇杷冬華實黃大如雞子小者如杏

味甜酢廣志 盧橘夏熟或云即枇杷

詩曰枇杷樹樹香杜盧橘楊梅次第新坡

古今事實

周祗植庭

周祗云枇杷寒暑無變負雪揚華余植之庭圃枇杷

賦序

古今文集

律詩

枇杷

楊廷秀

大葉聳長耳一梢堪滿盤荔支分與核金橘却無
酸雨壓低枝重漿流冰齒寒永去聲長鄉今在否莫
遣作園官

枇杷

劉彥冲

萬斛金丸綴樹稠遺根漢苑識風流也知不作清
明瑞朽腐聊関聖主憂

揚梅

羣書要語

揚梅其子大如彈丸正赤五月中熟

熟時似梅其味甜酸臨海異物志

古今事實

此楊家果

揚氏子年九歲孔君平詰其父設果有揚梅孔指
示兒此實君家果兒應聲答曰未聞孔雀是孔子
家禽郭子

古今文集

律詩

楊梅

可正平

五月楊梅已滿林，初疑一一價千金。味方河朔蒲桃重，色比瀘南荔子深。飛艇似聞新入貢，登盤不見舊供吟。詩成一寄山中友，恐解樓頭愛渴心。

謝紹興帥丘宗卿惠楊梅

楊廷秀

梅出稽山世少雙，情知風味勝他楊。玉肌半醉生紅粟，墨暈微深染紫囊。火齊堆盤珠徑寸，醴泉繞齒柘為漿。故人解寄吾家果，未變蓬萊閣下香。越絕諸揚盛一時，與儂瓜葛不曾知。一夫自笑吾衰矣，此客何從夢見之。也解過江尋德祖，政緣作尹是丘遲。渠伊不是南村派，未免先驅事荔枝。



蔗 糖霜附

羣書要語

蔗 說文 蔗交趾所生者，圍數寸，長丈餘。

甘蔗其餽為石蜜。

控斯蔗而療渴，若漱醴而含蜜。

之必折巧言，雖美用之必滅。

漿 楚詞 膳鱉炮羔，有柘

詩句

百味甘酒布蘭生，泰尊柘漿析朝醒。

古今事實

漸入佳境

顧凱之為虎頭將軍，每食蔗自尾至本，人或問之曰：漸入佳境。

鼠矢汗錫

見護謗門

始創糖霜

係糖霜

唐大曆間有僧號鄒和尚不知所從來跨白驢登
繖山結茅以居須鹽米薪菜之屬即書寸紙繫錢
緡遣驢負至市區人知為鄒也取平直掛物于鞍
縱驢歸一日驢犯山下黃氏者蔗苗黃請償於鄒
鄒曰汝未知因蔗糖為霜利當十倍吾語汝塞責
可乎試之果信自是流傳其法鄒末年北走通泉
縣靈鷲山龕中其徒追及之但見一文殊石像始
知大士化身而白驢者獅子也 三灼譜

古今文集

雜著

蔗產南方

甘蔗只生於南方北人嗜之而不可得魏太武至
彭城遣人於武陵王處求酒及甘蔗郭汾陽在汾
上代宗賜甘蔗二十條子虛賦所云諸柘也且諸
柘者甘蔗也蓋相如指言楚雲夢之物漢郊祀歌
泰尊柘漿亦謂取甘蔗汁以為飲 客齋隨筆

古詩

賦得甘蔗以上字為韻

舒信道

豐

瑤池宴罷王母還九芝飛入三仙山空餘絳節留
人間雲封露洗無時閑節旄落盡何爛斑野翁提
携出茅菅吳刀戛戛鳴雙環截斷寒水何潺潺相
如賦就空上林倦遊渴病長相侵劉伶愛酒真荒
淫狂來欲倒滄溟深此時一爵輕千金壚邊何用

文君琴五斗一石安足斟坐想毛髮生青陰蕭瑟
甘滋欲誰讓相梨橘柚紛殊狀冷氣相射盃盤上
顧郎不見休惆悵佳境到頭還不妄詩成雖愧陽
春唱全勝乞與將軍杖

雜著 以下係糖霜

糖霜譜

糖霜之名唐以前無所見自古食蔗者始為蔗漿
宋玉招魂所謂膈蠶包羔有柘漿是也其後為蔗
餠孫亮使黃門就中藏吏取交州所獻甘蔗餠是
也後又為石蜜南中八郡志云窄耳蔗汁曝成飴
謂之石蜜本草亦云煉糖和乳為石蜜是也後又
為蔗酒唐赤土國用此蔗作酒雜以紫瓜根是也

唐太宗遣使至摩竭陀國取熬糖法即詔揚州上
諸蔗榨潘如其劑色味愈於西域遠甚然只是今
之砂糖蔗之技盡於此不言作霜然則糖霜非古
也歷世詩人模竒寫異亦無一章一句言之惟東
坡公過金山寺作詩送遂寧僧圓寶云涪江與中
冷共此一味水冰盤薦琥珀何似糖霜羨黃魯直
在戎州作頌答梓州雍熙長老寄糖霜云遠寄蔗
霜知有味勝於崔子水晶盃正宗埽地從誰說我
舌猶能及鼻尖則遂寧糖霜見於文字者實始二
公甘蔗所在皆植獨福唐四明番禺廣漢遂寧有
糖水而遂寧為冠四郡所產甚微而顆碎色淺味
薄纔比遂之最下者亦皆起於近世唐本曆中有

鄒和尚者始來小溪之繖山教民黃氏以造霜之法繖山在縣北二十里山前後為蔗田者十之四糖霜戶十之三蔗有四色曰杜蔗曰西蔗曰芳蔗本草所謂荻蔗也曰紅蔗本草所謂崑崙蔗也紅蔗止堪生噉芳蔗可作砂糖西蔗可作霜色淺土不甚貴杜蔗綠嫩味極厚專用作霜凡蔗最困地力今年為蔗田者明年改種五穀以息之霜戶器用曰蔗削曰蔗鎌曰蔗甕曰蔗碾曰榨斗曰漆甕各有制度凡霜一甕中品色亦自不同堆疊如假山者為上團枝次之甕鑑次之小顆塊次之沙脚為下紫為上深琥珀次之淺黃又次之淺白為下宣和初王黼創應奉司遂寧常貢外歲別進數千

介是時取產益奇墻壁或方寸應奉司罷乃不再見當時因之大擾敗本業者居半久而未復遂寧王灼作糖霜譜七篇具載其說予采取之以廣聞見

容齋隨筆

律詩

糖霜

楊廷秀

亦非崖蜜亦非餠青女吹霜凍作冰透骨清寒輕著齒嚼成人跡板橋聲



橄欖

餘甘附

羣書要語

橄欖子大如棗二月華八月熟生

食味酢蜜藏乃甜美

南州草木狀

橄欖樹

身聳枝皆高數尺其子深秋方熟閩中尤重其味

云咀之香口勝含饴。香出吹人煮食，能解酒毒。有野生者，子繁樹峻，不可梯緣，但刻其根下方寸許，內鹽於其中，一夕子皆自落。嶺表錄異

餘甘子 梭形初入口舌澁酸飲水乃甘又如梅實

兩頭銳 異物志

古今事實闕

古今文集

古詩

橄欖

歐陽永叔

五行居四時，維火盛南訛。炎焦凌木氣，橄欖得之多。酸苦不相入，初爭久方和。霜苞入中州，萬里來江波。幸登君子席，得與眾果羅。中州眾果佳，珠圓

玉光瑳媿茲微陋質，以遠不見訶。餽飴兒女甜，遺求久則那。良藥不甘口，厥功見沉疴。忠言初厭之，事至悔若何。世已無採詩，詩成爲君哦。

橄欖

劉貢父

南珍富奇異，疇昔頗窮孽。夷荒不書傳，從古陋鉉。槩苞封走中土，天序異離坎。有香已變衰，有色多黯黯。今君此堂上，真物惟橄欖。青膚鏤瓊瑩，翠顯森菡蓄。苦爲幽人正，久見君子淡。甘壤彼包羞，日新此剛敢。清泉薦芳茗，臭味獨潛感。凜雪漬煩醒，滌除瑩玄覽。靈均採時菊，西伯嗜昌歎。廟鼎實調梅，壯士仍嘗膽。由來超俗好，諸絕不言慘。殷勤謝凡口，薤白空三噉。

橄欖

三元之

江東多果實橄欖稱珍奇北人將就酒食之先聲
眉皮核苦且澁歷口復棄遺良久有迴味始覺甘
如飴我今何所喻彼忠臣辭直道逆君耳斥退
投天涯世亂思其言噬臍焉能追寄語採詩者無
輕橄欖詞

律詩

橄欖

蘇子瞻

紛紛青子落紅鹽正味森森苦且嚴待得微甘回
齒頰已輸崖蜜十分甜

古詩

係餘柑

餘柑

劉彥冲

炎方橄欖佳餘柑豈苗裔風姿雖小殊氣韻乃酷
似驛顏澁吻餘髣髴清甘至侯門收寸長粉骨成
珍劑猶聞雜蜜草少轉森嚴味奇才用不專雖用
何殊棄端如效苦言逆耳多嫌忌棄果事何傷違
言德之累悅口易逢知感茲發長喟

衆菓

羣書要語 關

古今事實 關

古今文集

古詩

梅聖俞奇詠杏

歐陽永叔

鵝毛贈千里所重人鴨脚雖百箇得之誠可

珍予問得之誰詩
時新封包雖甚微
棄而淪開絨重嗟
惜詩以報慙慙

和聖俞鴨脚子

歐陽永叔

鴨脚生江南名實未相浮
絳囊因入貢銀杏貴中
州致遠有餘力好奇自賢侯
因令江上根結實夷
門秋始摘纔三四金奩獻
凝旒公卿不及識天子
百金訓歲久子漸多纍纍
枝上稠主人名好客贈
我比珠投博望昔所徒
蒲萄安石榴想其初來時
厥價與此侔今已徧中國
籬根及墻頭物性久雖
在人情逐時流惟當記其始
後世知來由是亦史
官法豈徒續君謳

永叔內翰遺李太博家新生鴨脚

梅聖俞

北人見鴨脚南人見胡桃
識內不識外疑若橡栗
韜鴨脚類綠李其名因葉高
吾鄉宣城郡多以此
為勞種樹三十年結子防山
獠剥枝手無膚持置
官省曹今喜生都下薦酒壓
葡萄初聞帝苑夸又
復主第褒纍纍誰採掇玉
椀上金鰲金鰲文章宗
分贈我已叨豈無異鄉感
感此微物遭一世走塵
土鬚顛得霜毛

古詩 係榧子

送鄭戶曹出席上果得榧子 蘇子瞻

彼美玉山菓紫實瘴霧脫蠻溪清尊奉佳

客客行何以贈一語加璧祝君如此身德膏以
自澤驅穰三彭仇已我心腹疾願君如此木凜凜
傲霜雪斲為君倚几淨滑不容削物微興不淺此
贈母輕擲

新編古今事文類聚卷之八十七